

Peqqissaanermi ikiortitut ilinniagaqarsimanerup pinngitsoorani peqqissaasutut ilinniaqqinnissamut aqputaaleqqullugu peqqissaasutut ilinniartitaanerup aaqqissuussaanerani pisariaqartunik allanngortitsinissamik sulissutiginneqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut Ilaasortaq, Anna Wangenheim, Demokratit)

Akissuteqaat

(Meeqqanut, Inuusuttunut, Ilinniartitaanermit, Kultureqarnermit, Timersornermit Ilageeqarnermullu Naalakkersuisoq)

Siullermeerneqarnera

Inatsisartunut ilaasortap Anna Wangenheimip, Demokratineersup siunnersuutaanut pisariaqartumut Naalakkersuisut qujapput. Peqqissaanermi ikiortitut ilinniagaqarsimasut pikkorrisut pinngitsooratik peqqissaasutut ilinniaqqinnissaannut periarfissiisoqarnissaa siunnersuuteqartup kissaatigaa.

Peqqinnissaqarfiup ukiorpaalunni unammillernartoqangaatsiarsimanera aammalu piginnaasalinnik sulisussaqaarniarnera pingaartumik peqqissaavinni mikinerusuni erloqinarluinnarnera Naalakkersuisut nassuerutigaat.

Peqqinnissaq pillugu Ataatsimiititaliarsuup isumaliutissiissutaani 2023-meersumi pissutsit ersarissumik saqqummiunneqarsimapput. Peqqinnissaqarfimmi piginnaasalinnik sulisussaaleqqineq illuatungilerniarlugu peqqinnissamik ilinniakkat pitsanngorsarnissaat pingaaruteqarluinnarpoq.

Peqqinnissaq pillugu isumaqatigiissutissaq pillugu isumaqatigiinniarnert aallartinneqarnissaat Naalakkersuisumit suliniutigineqarsimavoq. Partiit Inatsisartuni ilaasortaataitaqartut november 2023-mi peqqinnissaq pillugu isumaqatigiissuteqarput. Peqqinnissamut tunngatillugu ataqatigiissumik ilinniartitaanikkut pilersaarusiortoqarnissaa ilaatigut isumaqatigiissutigineqarpoq. Peqqinnissaqarfiup maanna siunissamilu sulisutigut pisariaqartitai naammassisinnaajumallugit peqqinnissamik ilinniakkanik naammassinnittartut amerlanerulernissaat anguniagaavoq.

Peqqinnissaqarfimmi pisariaqartinneqartumik nunaqavissunik nammineq sulisussaqaalersinnaanerput anguniagaasariaqarpoq nunatta avataaneersunik piffissamik sivikitsumi suliarortitsisarnerit pisariaarutsillugit.

Ilinniakkani ataasiakkaani atualersinnaanissamut piumasaqaatit ilinniarfinit aalajangersarneqartarput. Peqqissaasutut bacheloritut ilinniakkat Iisimatusarfimmi, pisortat ilinniarsiutaani namminersortumi ingerlanneqartarput. Peqqissaanermi ikiortitut ilinniagaqarsimanerup peqqissaasutut ilinniaqqinnissamut aqputaalernissaa anguniarlugu ilinniakkap aaqqissuunneqarnissaa pillugu Naalakkersuisut Iisimatusarfimmut saaffiginnissapput.

Siunnersuut Naalackersuisut tapersornartippaat peqqissaanermilu ikiortitut
ilinniagaqarsimanerup peqqissaasutut ilinniaqqinnissamut aqquaalernissaa anguniarlugu
ilinniakkap aqqissuunneqarnissaa sulissutiginiarlugu.

Taamatut oqaaseqarlutik Naalackersuisut siunnersuut akuersissutigineqassasoq inassutigaat.